

江西詩徵

江西詩徵卷三十一

南城曾煥賓谷編輯

元

歐陽應丙

應丙字南陽新喻人薦授翰林檢閱轉天臨路經

歷有雙石集

小姑山謠

小姑近在水平中  
芙蓉爲衣蘭佩香  
翡翠奮翼青霞光  
宛其螭首蛾眉長  
紫金芙蓉出綠波  
白玉臺鏡開青螺  
涉江浩蕩興無極  
臨風窈窕揚清歌  
大姑阿姨寄傳語  
相望烟波奈何許  
日煖江南滿白蘋  
金釵落地風輕舉

莫相疑

莫相疑古有幽并之壯士步出燕之南門易水之涘易水  
東流晝夜聲未必秦人便濟兵君獨何爲兮簷簷迫人天  
如穹廬兮代雲無色關山渺茫兮風吹沙礫送客相看淚  
沾臆今持一七首入不測之關中僕少遲留待客同同客  
未至事當爾今子疑之行決矣聲曰高漸離宋如意丈夫  
不許人則已許君節俠爲君死擊筑高歌髮上指酒酣日  
落客登車終不回頭顧燕市咸陽宮殿曉花紅秦王聞客  
得恩恩設九賓兮備禮見燕使兮上宮舞陽同勇不同氣  
持圖可笑僵秦陛當年約契竟何如生刼始知成誤計縈  
殿柱擲七首事不成祖龍走空餘壯氣不消沒化作白虹

貫秋月

曾元烈

元烈字模遠南豐人以父蔭監郡武務曹

崇安次舍弟君靜見寄韻

功名本是男兒事牢落其如命薄何千里每懷吾弟遠數  
年相別故人多悠悠世態風前葉渺渺歸心海上波獨夜  
不成春草夢倚闌無語看星河

挽陳巡檢

一官無命亦堪悲迢遞閩南旅襯歸雲暗海門雕已沒雨  
寒江路馬空飛家童掩淚收殘稿慈母挑燈認故衣百尺  
畫樓如舊日斷腸烟柳自依依

次韻

豈是金臺無路通不隨桃李媚春風  
三間破屋青山下數卷殘書白日中  
柳市亂鶯喧露翠蒲塘幽鳥啄沙虫  
蕭然巾屨無閑事獨立溪南看晚虹

次韻許錄事尋梅

訪梅幽勝地長憶在錢塘湖水孤  
山側石橋官道旁雪晴鵝鵲集雲  
暖蝶蜂忙一弔林和靖墳前草亦香

次韻曾英山同拜先塋

拜掃先人墓傷心下馬陵霏霏三月雨  
寂寂九京燈坂遠水平帖峰危石亂層  
蒼苔酌尊酒來此記君曾

李 燦

粲字粲然號炯齋永豐人官推官

悼程習軒

忠壯宗風舊山林隱趣深圖書偏有味軒冕本無心  
萊蕪多遺綵韋纈不貯金陳原重回首草露在衣襟

贈徐則聞

江西詩派祖涪翁時有徐生在派中三百餘年幾絕響  
又傳家法過江東

上官伯圭

圭一作圭

伯圭字敬和安仁人以薦爲太子說書後官崑山  
令

題雲林子南村隱居圖

避世尋幽處虛堂倚石臺響泉清磬合飛嶠畫屏開竹散  
風前影松垂雨後苔浮沉應不問何似小蓬萊

黃鎮成

鎮成字元鎮昭武人築南田耕舍隱居著書至順  
間部使者屢薦不就後政府奏授江西儒學副提  
舉命下已卒集賢院定號曰貞文處士有秋聲集

按昭武卽  
今撫州

春雨南田書事

流水三椽舍桑陰五畝田飯香分野碓茶熟候山泉石榻  
看雲坐谿窗聽雨眠桃花川上路應有釣魚船

鉛山早行

早起辭林館鄰雞已早鳴月弦當戶直斗柄插山高細涇  
侵藜杖輕寒襲布袍前趨東日上五色動雲濤

### 乘涼

借屋依喬木乘涼愜病身日回山有影風遠竹無塵除地  
平施榻攀條側挂巾應攜龐老宅眞作鹿門人

### 南山紫雲山居

一宿南山頂仙凡此地分河明疑有浪天近更無雲月色  
初秋見泉聲徹夜聞紅塵飛不到甘與鹿爲羣

樹老秋仍露山空晚更蟬雨添春藥水雲濕種瓜田對榻  
僧長坐聞鐘客未眠自應麋鹿性疎散愛林泉

絕壑開闌檻遙峰展畫圖雪翻僧供鉢雲繞佛香爐接板



橋橫澗連筒水入厨杖藜行藥去九節得菖蒲  
竹露連巖際松風滿坐隅水春如有節山鳥似相呼暑雨  
收崖蜜晴雲斷土酥月高秋萬宇身世一冰壺  
絕境紅塵遠高居白日長僻宜人不到靜與世相忘宇闊  
星辰大山虛水石涼翠屏天外立秋氣晚蒼蒼

題朱澤民畫山水

與客浮山水琴書共一舟雲間雙樹曉天外數峰秋指顧  
銷塵慮棲遲發擢謳未知身是畫明月滿滄洲

東陽道中

出谷蒼煙薄穿林白日斜岸崩迂客路木落見人家野碓  
喧春水山橋枕淺沙前邨烏柏熟疑是早梅花

春日東行

青郊冉冉散晴暉  
芳樹頻聞一鳥啼  
山驛水流花落盡  
石田雲煖麥抽齊  
禪房鑿路當巖半  
釣屋維舟近竹西  
行過野橋人語近  
尋源應到武陵谿

題秋江把釣圖

獨載輕舸過碧川  
一綸牽動楚江天  
蘆邊有月還吹笛  
柳外無風不繫船  
畱火夜然湘岸竹  
得魚朝送酒家錢  
十年湖海真如畫  
亦欲狂歌一扣舷

遊麻姑山用蔣師文韻

紫霧龍鸞月裏遊  
白銀宮殿海中洲  
麻姑宴罷壇猶在  
葛令丹成井獨畱  
滴雨浮嵐空翠晚  
飛花散玉瀑簾秋  
誰能

共食金光草來住仙家十二樓

舟過石門梁安峽

書畫船頭載酒迴滄洲斜日隔風埃一雙白鳥背人去無  
數青山似馬來天際雨帆梁峽出水心雲寺石門開同遊  
有客如高李授簡惟慚賦峴臺

送憲幕陳時中分題得平章河

海國猶傳利澤功滄溟縹緲百蠻通潮來估客船歸市月  
上人家水浸空析木星辰三島外樽桑宮殿五雲東河梁  
此日重攜手日送靈槎萬里風

晚晴書事

白鶴樓西晚雨涼欲晴山氣遠蒼蒼鴉銜落日歸平楚鴈

背殘霞上越陽溪  
崦嵫茅瑤理釣畬  
田收木好休糧秋  
風有約巢雲去却  
擬狂歌學楚狂

臨川青雲亭

平野荒荒雉堞低  
一峰闌檻與雲齊  
斗牛三尺龍光照  
城郭千年鶴爪題  
白雨來時江水北  
青山盡處夕陽西  
古來亦有憑高客  
樹影蒼涼繞大隄

題定武蘭亭

蘭紙香隨玉匣遺  
寶書天上世難知  
狼烽幾墜昆明劫  
蟬翼猶傳定武碑  
曉雨苔花侵擣石  
秋山柿葉費臨池  
東都已往誰能繼  
神物終煩謹護持

鼓山靈源洞

劣削峰頭萬丈梯上方高與白雲齊青山盡處海門闊紅  
日上來天宇低喝水無人空宴坐磨崖有客漫畱題飄然  
欲御長風去一笑何須過虎谿

辛巳還光邑祖居上井約少府同到

東井田廬故邑非十年風雨寸心違江湖水闊冥鴻去城  
郭春深老鶴歸桑梓盡隨黃壤化松楸空望白雲飛梅仙  
此日能相約竹杖相攜上翠微

舟過大茅洋

漲海漚波寄一桴候神東去接方壺帆隨雪浪高還下島  
浸水天角若無鴈影斜翻西日遠潮聲直上晚雲孤投綸  
擬學任公子掣取封鯨飫萬夫

補陀島

一片雲帆駕渺茫東臨絕島拂扶桑九天波浪隨星客萬  
壑魚龍覲水王日觀遠開溟渤動雲臺倒浸白花香候神  
海上應相見爲覓安期却老方

錢塘

雨過高風發屋聲吳中暑退卽寒生晴光入眼園林薄夜  
氣侵人枕簟輕寺鐸呼風宵自語鄰機織月曉猶鳴江湖  
處處悲秋客起束歸裝不待明

西窗晝雨

三春驚過半霪雨灑窗西鵲腦添爐炷春鳩隔樹啼

谷口

谷口橋邊日未斜先尋宿處近梅花分明聽得吹長笛祇  
隔紅闌第一家

春日行近山

門外山童掃落霞問師還只在山家推窗引客雲邊坐自  
扇風爐煮雪花

柯亭

金碧樓臺宅梵王柯亭無處問中郎何當截取如椽幹吹  
起崑邱紫鳳凰

南田夜雨

四簷春雨夜浪浪記得吹笙近竹房三十五年江海夢又  
隨歸鴈過瀟湘

南田耕舍

跨鶴來尋處士家，迢迢空翠隔烟霞。  
山童揖客松邊坐，却背春風掃落花。

行到長松野水間，吹簫石上不知還。  
嵐光已重衣裳冷，自扣巖扉月滿山。

石橋山

散策南山下，逶迤登石橋。  
五涉曲澗水，兩山鬱嵒巖。  
竚緣度絕壁，攀蘿俯山椒。  
懸瀑瀉層崖，冰華垂空瓢。  
盤紆上石磴，天梯颺回飈。  
厠足得平地，聳身凌丹霄。  
入谷煙霞深，松竹聲蕭蕭。  
會當發天秘，翦此荆榛條。  
結屋棲白雲，覽矚千峰遙。  
土沃旣宜耕，山深仍可樵。  
因之習天遊，已足遠世囂。



悠然萬物表我隱誰能招

避地椒歷

鄰家急相報且往椒歷山登陟如猿猱合沓同躋攀遠近  
火煙起指點望城間椒歷不可住迫晚登孱顏夜宿草樹  
中露下山氣寒

三郎山

曉度三郎山雲深逕盤濕斜迤下陽坡人牛競來集汲泉  
吹野火煮飯分餘汁扶難感藜杖欹倒僅能及行行不可  
望危峰倚天立

予作南田耕舍諸公賦者率擬之於老農噫人各有  
志同牀而不察世之君子乃欲責人之知已不亦難

手因作寫懷二首以自解云

白日不停馭頽波竟東馳忽忽年歲改念此將安歸我欲  
驅車行太行路嶮巖我欲駕方舟滄海無津涯豈不顧行  
邁出門慎所之有田南山下可以供盛粢有廬在中田可  
以譚書詩上探羲皇際下及商周時賢聖尚淪落微生何  
足疑懷哉羨門子千載以爲期

種山南山下土薄良苗稀稊稗日以長荼蓼塞中畦路逢  
荷蓀人相顧徒嗟咨我欲芟其蕪但念筋力微終焉鮮嘉  
穀何以奉年饑誰令惡草根亦蒙雨露滋豈無力耕人悠  
悠興我思

遠適

吉日有遠適我行志四方西馳窮河源東望臨扶桑南通  
火維外北達冰竈傍勿謂天地闊勿謂歲月長驚馬積十  
萬千里追飛黃大鵬發天池搏風起翱翔誰能守阜樞不  
復馳康莊誰能斂羽翮但學檣榆枋大道甚平夷誰謂阻  
關梁寄言遠適者日進不可量

桃花巖

小僉山中數塊石上出浮雲幾千尺寒泉飛下絕澗響老  
樹倒挂蒼苔壁巨靈擘斷知何年中有古洞藏神仙蓬萊  
宮闕清杳靄世外别有壺中天巉巖磊砢相緣入雲霧晦  
冥光景集丹房石室淨無塵虎攫龍拏半空濕山人舊說  
桃花巖山高水絕無由探我來正值巖花發長嘯獨倚春

風酣同遊雅士貪幽趣自劄山雲燒筍具兩山流水一川  
花依稀自是桃源處世上紛紛吹戰塵山中道人都不聞  
欲從君住不可得一聲孤鶴唳空雲

題墨菊

江南九月秋風涼秋菊采采金衣黃近時丹邱出新意却  
灑淡墨傳秋香青城學士曾題藻散落人間共傳寶卷舒  
造化入毫端回首東籬自枯槁東陽傳君心好奇何處得  
此秋霜枝湖湘衲子遠相貺筆勢迴與丹邱齊香英細蹙  
元玉屑老幹拗斷烏金折不隨粉黛學時妝自與幽人同  
志節淵明已逝屈子沈晚香縱有誰知心感君畫圖三歎  
息爲君長歌楚天碧

李將軍歌

李將軍少年意氣輕浮雲青絲絡馬黃金勒寶劍錯鏤交  
龍文十二高樓連廣道千金結客大梁門昨日彎弓連白  
羽射殺南山白額虎歸來饗士酒千鍾自向青樓按歌舞  
前年起兵從義旗斬將陷陣身如飛上功幕府久未報有  
酒不樂當何爲

直沽客

直沽客作客江南又江北自從兵甲滿中原道路艱難來  
不得今年却趁直沽船黑洋大海波連天順風半月到閩  
海只與七州通買賣嗚呼江南江北不可通只有海船來  
海中海中多風多賊徒未知來年來得無

島夷行

島夷出沒如飛隼右手持刀左持盾大舶輕艘海上行華  
人未見心先隕千金重募來殺賊賊退心驕酬不得爾財  
吾藥婦吾家省命防城誰敢責

莫獮行

莫獮射生蠻峒谷窄袴短衣雙赤足前年應募作官軍惡  
少如雲學裝束千邨一過如蝗落婦滿軍中金滿橐鷹冠  
擊碎且勿嗔鄰寇不虞吾所託

投贈鄭守光遠三十韻

累洽開皇極分藩重守臣列茅周土舊分竹漢符新師帥  
能宣化儀刑最近民隼旗張日月雉閣麗星辰地紀逾荒

服天光照遠人選才歸德器分命聳朝紳一代文章伯羣  
心怙恃親祖風先藹藹家學早振振聽履曾馳譽工書固  
絕倫九苞騰鸞鸞千里驟麒麟仗引陪供奉官聯屬選掄  
河源通析木星象擁勾陳暫輟中朝紱來紆外府輪土風  
連太末山節聳全閩佐乘臨漳浦塞帷入劔津近河能借  
潤依燭解光鄰化雨蘇民望祥風洗瘴塵袴襦歌已浹刀  
劒俗咸悅山郭惟樵郡封鄰接海濱地偏田少沃土狹戶  
多貧捐瘠饑瘞并流亡寇役頻震凌思大厦枯枿溪洪鈞  
幸循循良牧咸依撫字仁晝長簾似水更靜月如銀赤社  
分南服清都拱北辰報看三月政和觀萬家春少日探經  
筭頽年媿席珍雨畦仍把耒風艇自收緝喜見瘳民瘼無

由傳吏循祇須成德化濡筆頌堅珉

倪道原

道原字太初安仁人以明經就試不利遂事遊覽  
後沒於都門名公卿賁金葬之題曰江南吟士之  
墓有太初集

奉呈虞侍講

文帝中興戢武威元臣高步列彤闈玉鞭調馬陪春宴銀  
扇迴鸞從夜歸立仗官曹移講席捧香侍女拂朝衣龍輿  
一去橋山遠獨抱孤雲萬里飛

五載抽毫侍禁中上賓虞舜協時雍頻裁密詔頒三省旋  
寫新詞降六宮金井蟾蜍分碧露玉杯鸚鵡醉香風詔歸



特賜金蓮炬迢遞蒼龍闕角東

萬里驅馳別帝鄉蜀江南下楚山長宮衣滿篋雲霞爛御  
酒分杯雨露香恩湛鏡湖新賜水夢隨玉殿舊班行杏花  
疎雨催春色人在吳中聽樂章

送道者歸閩省親

採藥求仙碧海東客行重入故鄉中銅盤露滴三秋月玉  
杵霜飛五夜風榕葉盡從來後老桃花只是去時紅南真  
奕世多仙氣衡岳峰頭幾歲逢

寄簡吳宗師

桂旗蘭蓋肅駟騑暫領仙官出禁闈泰時神光修夜祀函  
關紫氣望東歸蛟龍宛尾承香案鸞鶴分翎織綺衣列岳

編福迴祝冊五雲高拱近天威

送人入京

十載秦城夢寐間客衣重著思漫漫江河衆水分流出濟  
岱諸山對海安茅店聽雞霜月白柳橋飲馬曉風寒舊藏  
篋內陰符在贏得蘇郎對雪看

牢落乾坤見二毛登邱却望鳳城高城頭擊柝橋烏起塞  
上吹笳櫜馬號壯士語深留寶劒故人情重贈綈袍廟堂  
進用多才傑青眼高歌望爾曹

贈人遠遊

遠辭雲月謝松蘿頻倚郵亭拂太阿裘解鷓鴣春臥穩杯  
乾鷓鴣夜吟多三韓方丈連滄海華岳終南隔大河此地

經過重回首天門佳氣正嵯峨

題成趣亭

吳氏亭臺水竹間百年幽興滿松關  
匏樽雪後移當徑石榻晴來臥看山  
畫日鳴雞花下散春風飛燕柳邊還  
楊雄五畝城西宅草就元經未得閑

送傅與礪廣州教授

秋盡黃茅瘴霧收計程君合到交州  
天垂北極星文麗地盡南圖海氣浮  
靈藥謾從方士采明珠豈效賈胡畱  
臨岐不作經年別有約看花上苑游

陳 植

植字中吉號中山永豐人通五經尤精春秋學元

統元年進士授翰林待制謫廣東博羅令歸建中  
山書院學者宗之

餞理伯容調江西憲掾

五阨春官第重登  
憲府新人皆形迹  
避君獨肺肝  
眞日飲瓢分水  
風行彗掃塵  
明朝江右客  
秋色滿湖濱

奉題丁氏竹堂并寄廷玉嚮仰之意

慈州二判經年別  
黃鶴山前見阿咸  
聞築新堂臨水勝  
剌戟修竹與雲參  
午風窗戶清含雪  
晴日琴書翠滴嵐  
欲拉王猷時共造  
幅巾揮塵縱清談

餞郭端友赴掾巴陵并寄希仁兄問訊之敬

送客巴陵日遠鴻  
英年嘉樹玉青蔥  
門趨畫戟諸侯貴  
地

閨輿圖七澤雄極浦揚舲清漳闊亭衢遷轡碧霄通別來  
安穩懷鄉否須問年同鞠贊公

題甘文卿杏隱卷

補子洲南萬杏花一壺仙隱客成家抄書簷下分香露洗  
藥溪邊踏錦沙布素屢煩卿相揖劍芒終拂斗牛斜曲江  
又廢明年會栽樹何由見綺霞

鄧梓

梓字文若奉新人元統元年進士

錦雉圖歌

錦衣繡翼何揚揚棠梨花開春雨香雌雄並立久未翔  
咫尺或是山之梁林深枳棘如人長摩挲竹枝思鳳凰

李 祁

祁字一初茶陵人元統初進士授翰林供奉歷浙  
江儒學副提舉後避亂隱于安福之上麓山自號  
危行老人以觴咏自娛洪武初卒有雲陽希遠等  
集

遊元陽洞

昔年曾上鳳凰臺今日重携勝侶來洞口雲寒龍睡穩松  
梢煙暝鶴飛迴蒙茸翠艸山腰合璀璨瓊芝石罅開千載  
何人傳相業夜深凝睇望三台

傳杏金

杏金字與礪新喻人學詩於范德機元統三年以

薦佐使安南歸除廣州文學教授有清江集

少年行

長衢若平川輕車馳流波上有都人子明肌豔朝霞芳塵  
揚遠風白日耀舞羅少年輕薄兒調笑相經過狎坐酌美  
酒日暮酣且歌千金罄一笑豪右焉能加時俗誇朱顏美  
女悅春華春華豈不好遲莫當如何

經采石

未明發蕪湖終飯次采石大江天同瀉巨浪山與敵松寒  
蒼蚪姿崖古老鐵色其旁有仙冢云是李太白生爲長庚  
精沒與大塊息因思開元中出入蒙帝澤御羹白瑤杯宮  
硯青玉滴恩榮日深重意氣何赫奕酣歌泰華小豪飲渤

海客頗聞宮中怒遂有天上謫殷亂微子行楚昏屈平斥  
嗟我唐家帝同姓逝安適何年爲茲游千載但故迹騎鯨  
信縹緲捉月詎昏惑得非厭塵羈無乃達寄客翻然委之  
去富貴何足惜杜陵平生友夢寐頻見憶白骨焉所求青  
山亦岑寂相去嗟已遠令人心悲塞舉酒欲酹之帆去招  
不得

送陳衆仲助教赴江淞儒學提舉

秋風吹浮雲鳴雁復南翔山川何寥慄草木日夜黃客行  
歲云除僂俛懷舊鄉君行卽吳會執別此河梁淮泗多奔  
流雲海浩茫茫靈鷲翼飛鱸馳景曜征裳去途日以遠來  
會日已長援之不可得躑躅情內傷



九日夷山驛

馳驅涉長道時節良易更去日能幾何商飈颭以盈元蟬  
號且息羣雁翻南征茲辰揆重九在俗豈殊情抗袂出虛  
館登樓望舊京圓穹無畱翳素顯有餘清延矚周四遐但  
見古時城頽宮委蔓草喬岳襲前名茫茫陰陽間感此百  
慮并我性不解飲虛觴聊自傾

和趙德隆秋夕雨

落景翳重城凝陰起初夕蕭條飛雨至散漫輕飈激洒幌  
靜彌多喧簷暴復息清商亂急管遙怨生離席游子恒念  
鄉氣淒感時易旣興北風嘆亦抱南山戚晨雞不廢度征  
雁無寧翼嚮道歸夙期寸陰違所惜詠歌良可興幽裏坐

填積

四月十四日發京

六龍西北馳羣鳥東南翔感我客游士心神隨飛揚迢迢  
逾大河怳怳越崇岡已驚時序易復念道路長驅車出東  
門浩歌慨以慷燕薊豈不樂吳楚爲我鄉父母久違離兄  
弟不在旁當茲遂歸去聊可慰中腸

劔門圖

劔門天下險亦復天下壯崢嶸扼西南氣欲軋萬象石壁  
摩往來風湍束奔放深蟠虛無底峭出日月上二儀含崎  
嶇萬古設眺望一夫或當關強敵不敢傍胡爲昔人國恃  
此亦傾喪聖朝今無外皇化極浩蕩勢挾秦漢爭治同唐

虞讓乃知不在險六合德可王前年南中行其地少平曠  
縣車度重隘束馬下疊障翻疑蜀道坦劒閣固殊狀及此  
觀畫圖間關愁西向浮雲從中來日莫一惆悵

琵琶怨

美人揮哀絃上客嘆蛾眉急響多悲思孰知心所之感昔  
奉綢繆不言生別離誓將桃李顏結君長相思如何雙栖  
翼中路怨乖睽不怨歡會難但恐恩愛虧含情冀回顧中  
曲多苦辭君子苟不聽賤妾欲奚爲

團扇辭

團扇昔在時素手不相離涼溫得君意動息亦有儀炎暑  
良未徂恩愛詎中衰何言遽相失一旦棄如遺舊物諒非

貴故心不可移願因新人得持以置君懷

題山水小景

空村斷行跡深雪連昏暮慘淡旣平岡坡陀復盈路時聞  
一樹折猶見羣鳥去中有映書人柴扉對何處

江白雲稍歸山青樹如沐輕舟漁石渚獨騎經林麓野氣  
昏已明泉聲斷猶續坐憶汎湘時村西見茅屋

雲歸山欲暝月出泉相映石影生夜寒松聲起僧定遙疑  
露下立或發風中詠幽境何閭寥長廊罷鐘磬

盤盤蒼山根泉石如素練含風靜復響觸石驚相濺竹迴  
秋氣來松涼夏陰轉山翁閑妙理獨立無人見

題墨梅

老樹亞晴空疎花帶寒野風流不自惜澹泊從人寫歲宴  
孰能娛空山少來者

孤花何婉婉玉立含幽素短短時出橋疎疎或臨路生疑  
簷下月半照牆西樹

奉題仇工部壁間古松圖歌

蒼松在山自奇古灌木翳之人不驚忽然圖向堂上壁滿  
坐嘆息長風生交柯岨走森晝晦其下將疑鬼神會霧雨  
塞竈虎豹毛雷霆怒拆蛟鼉背乃知巨筆老且神力幹造  
化雄千鈞皇天不夭棟梁具后土潛回霜雪春爾松已爲  
人愛惜見爾爲爾生顏色山中豈無材木倚絕壁未逢匠  
石嗟何益

賦得秋夜長送方叔高

叔高名積  
九江人

秋夜長長如歲長如歲尚可夜涼薄人不能寐羣雁各南  
翔一鳬尚北飛團團素明月流光照我衣當歌正激烈慷  
慨送將歸丈夫成名微亦足焉能終夜悲刺促

秋月皎皎夜何長念君客游思故鄉當壚美人惜年芳長  
夜起舞歌清商歌清商送急管爲君酌美酒請君勿辭滿  
夜長迢迢漏未終離思比之何時斷離思長夜猶短

渾沌石行

九江方叔高得武侯陣磧中小石于其處  
白質而黃章狀若雞子字曰小渾沌揭藝

文爲作渾  
沌公傳云

渾沌以來不可數萬八千歲生盤古網緼乃在卷石間光  
怪潛通落星渚來從魚腹人盡訝坐念武侯心獨苦八陣

圖成泣鬼神三江石轉周寒暑蒼波噴浸圓且堅雞子結  
成生理全久當化鳥非爲怪大未成羊亦可仙玉精隱月  
相照射金液流霞紛繞纏輕清已判中黃外元氣猶涵太  
素前英雄事往唯存石天衡地軸今誰識江上嘗疑霧雨  
寒坐中歎恐風雷黑摩挲直如見溟滓位置豈同同沙礫  
長路相將拂劒隨天陰勿使精靈得

白苧詞

白苧白白如霜美人玉手親自浣製作春衣宜短長春衣  
成有時遠行歸無期願君著衣重愛惜風塵變白能爲黑  
奉題達兼善御史壁間劉伯希所畫古木圖

遠樹含陶姿近樹亦古色水傍嘗見畫不得乃在君家中

堂之素壁青林寂寞行人窈白澗微茫斷烟隔入門蕭蕭  
雲氣生落日便恐歸禽爭耳後颼爽寒風聲知君夜眠愁  
雨黑畱客晝坐宜秋清劉侯學李成畫手稱獨步時見作  
古松盤屈百怪聚中林一株直且良安得劉侯寫其趣

古杉行題陳兵曹所藏李遵道畫靈隱道中二杉圖  
靈隱道中古杉樹上與雲霧相膠葛李侯一見爲寫眞霜  
雪蕭蕭起毫末此杉蒼茫幾百年鬼物扶持人所憐貞心  
豈容螻蟻蝕老幹或有蛟龍纏山林萬里那得致見者皆  
驚棟梁器暗壁尋常度雨聲晴窗彷彿生秋氣吾聞大廈  
衆力持此杉誰能久棄之君不見道邊不材木臃腫百圍  
安所施



邯鄲行

邯鄲城頭下白日邯鄲市上風蕭瑟故壘空餘鳥雀悲荒  
垣只見狐狸出何王墳墓對山阿常憶諸侯爭戰多趙客  
歸來重毛遂秦軍老去畏廉頗黃塵白草宮前道鬼火如  
燈夜相照公子秋來不見過美人月下那聞笑當時冠蓋  
激浮雲攪鐘考鼓宴青春只今惟有郵亭樹還送年年行  
路人

遠將歸

遠將歸恨歸晚通州河頭有船雇行人將歸不言遠人家  
生子少離鄉一生長在父母傍自憐出入無年月北走京  
師南走越他人富貴棄貧賤一日金多棄鄉縣小官祿簿

何足爲得及父母康強時說著還家客心喜此身雖貧亦  
不恥

孫伯大山水圖

齋居胡爲見雲壑白日虛嵐滿秋幌河水深蟠地底回層  
崖險歷空中上蒼茫不知開闢始只尺須論數千丈林端  
遠岫微有無崑畔精藍蔚蕭爽雜樹縣蘿拂輕黛寒松覆  
谷含清響仙源或在人間世洞口孤舟欲長往嗟我平生  
最漂泊中年萬事何鞅掌憶昨征行多所經至今絕境懷  
幽想雷霆半夜山忽至風雨三春石應長對我聊歌隱士  
之無因一試仙人杖

書陽羅堡

微雨蕭蕭溼行李馬頭卽見長江水煙浦明侵白鳥邊風  
帆亂入青天裡故人南北久離居况復經年無素書明日  
重吟漢陽樹何須不食武昌魚

題篤御史海鵲圖

空庭海鵲誰所狀海氣初高鵲神王雲脚西騰弱水涯潮  
頭東出飛霞上此時扶桑色始分下視百鷺空其羣日中  
金鳥側相避籬下凡禽何足論

大霧過安慶

水郭浮鯨室雲帆度客星江空連海白山遠入淮青訪古  
聊須到乘流未可停遙疑天柱曉風霧颭精靈

七夕

耿耿玉京夜迢迢銀漢流影移烏鵲樹光隱鳳凰樓雲錦  
虛張月星房冷閉秋遙疑天帝子辛苦曾牽牛

卽事

目斷虞淵日心傷魏闕秋霍光元在漢周勃固安劉廟社  
多佳氣公卿足遠猷宸居終不改羈旅莫深憂  
未有龍庭使猶嚴虎衛兵雲山秋塞遠星月夜樓明逆旅  
多防盜遷居競入城竊聞神器定且可慰羣情

盧溝橋

古道曠秋色平橋臥夕陽水聲西下急山氣北來長數騎  
凌空闊孤煙入渺茫人傳耕種地宿昔戰爭場

拒馬河

落日蒼茫裏秋風慷慨多燕雲餘古色易水尚寒波岸絕  
船通馬沙交路入河行人悲舊事含憤說荆軻

巷口曉行

早起星猶在前行路稍分人家隔樹見山鳥過橋聞澗響  
多于雨林昏半是雲曉逢力田者愧爾一朝勤

臨湘

宿雨愁泥滑長途畏日斜黃歸幽徑犢青聚古祠鴉野屋  
時依竹山園各種茶巴陵看漸近遙識古人家

桂林

桂林南望遠山路與雲連淺水清涵石攢峰亂刺天千戈  
仍歲月瘴癘接風烟蠻寇何能定邊氓亦可憐

賓州

過嶺東猶熱緣山夜未寧樹殘兵後藉草發燒餘青西寇  
迷仙霧南人候使星民居日稀少惟見短長亭

臘日入安南

冬入安南國雲迎使者輶郡聞秦日置柱想漢時標江路  
篁猶籜山田稻始苗皇恩涵遠邇行役不辭遙

馮高

世祖初開業安南蚤貢琛國蟠螭角小地接大牙深使節  
猶頻入蠻兵莫見侵數州須拯恤萬感寄登臨

浯溪

機權依江岸尋橋過寺門竹深題字滿苔古刻文昏石色

兼雲冷溪聲雜雨喧吾亭正何處爲覓漫郎孫

長沙見嚴親

游子方春至嚴親盡日憐別來憂道路喜定問山川百粵  
元過嶺三湘總入天歸朝誠努力江上莫畱連

金陵晚眺

金陵古形勝晚望思迢遙白日餘孤塔青山見六朝燕迷  
花底巷鴉散柳陰橋城下秦淮水年年自落潮

六月二十八日至京

使節遑雙闕天書下百蠻雨蒸歸日路雲合去時山嶺表  
兵猶動灤陽駕未還安邊數策在不得犯龍顏

發通州

燕騎經旬發吳船此日行樹知風起色帆識雨來聲驟轉  
長林暗斜分絕塞明河流今夜滿無復滯歸程

送雲間師游瀾

杖錫違蕭水風帆向武林海紅秋樹遠江黑暮鐘深雲起  
迴香氣潮來合梵音亦知無住著隨處得安心

公樓

樓上秋風吹畫屏樓前秋思滿都亭金河水去涓涓碧瓊  
島雲來冉冉青近見蕭何成第宅舊聞汲黯在朝廷明時  
進用多英傑迂腐深慚守一經

秋興

入上旌旗卷莫寒人間鼓角送悲酸瑤池落日迴青鳥月



殿浮雲掩素鸞  
楊柳漸稀秋瑟瑟  
芙蓉已老露溥溥  
砧聲  
近南鄰客  
寥落  
羈懷強自寬

落木蕭蕭滿帝畿  
候蟲處處趣寒機  
客星入斗秋深見神  
人  
在  
三  
日  
晏  
歸  
復  
喜  
諸  
公  
扶  
社  
稷  
憐  
弱  
弟  
奉  
庭  
闈  
短  
章  
聊  
能  
頻  
回  
首  
目  
送  
江  
南  
鴻  
雁  
飛

梧桐樹晚細含烟  
闔闔門深總映天  
龍去鼎湖雲漠漠  
鶴吟華表月娟娟  
東都日望金輿發  
南徼猶驚羽檄傳  
只在  
忠  
良  
勤  
夙  
夜  
五  
陵  
佳  
氣  
故  
依  
然

日日遙看錦繡縣  
重重樓閣隱青煙  
化城或在諸天外  
方丈長疑積水邊  
每說神僧飛杖錫  
更聞童女上樓船  
西風日暮何蕭瑟  
一度登高一惘然

敝裘已畏早寒侵歲月祇驚久客心  
莫倚長卿能作賦始知季子固多金  
天門守虎星辰冷雲氣從龍霧雨深  
直北關山時極目背人聊復短長吟

雪中次元茂才

北闕今晨雪滿墀腐儒憂國畏人知  
月寒弱水迷三島雲暗蒼梧失九疑  
瑞木細飄天上葉梅花潛發嶺南枝  
山陰那得乘佳興起繞前軒自詠詩

上蔡

上蔡城頭黃葉多聞雞看劍起長歌  
徒憐丞相東門犬猶憶將軍半夜鵝  
樹底衣裳沾雨露馬前燈火動星河  
涼風滿路吹行鐸那似金門聽玉珂

興安縣

亂峰如劒不知名  
篁竹蕭蕭送驛程  
轉粟未休灘水役  
負戈猶發夜郎兵  
百蠻日落朱旗暗  
九嶺風來畫角清  
空使腐儒多感慨  
西南羣盜幾時平

書南寧驛

歲晚馳驅憶帝京  
北風回首重關情  
中天日月迴金闕  
南極星辰繞玉衡  
父老尚煩司馬檄  
蠻夸須用伏波兵  
也知文德能柔遠  
傳道新恩欲罷征

題大使館

元統三年頒正朔  
詔書遠到極南開  
使旌入館青雲動  
仙蓋臨江白日迴  
諭蜀豈勞司馬檄  
朝周終見越裳來  
還家

耆舊應相問文化如今徧九垓

却侍姬

夜宿安南天使館主人供帳爛相輝寶香烟起風過席銀  
燭花偏月照幃王母謾勞青鳥至文簫先放彩鸞歸書生  
自是心如鐵莫遣行雲亂溼衣

過故妻墓

湘皋煙草綠紛紛洒淚東風憶細君每恨姮娥工入月虛  
疑神女解爲雲花陰午坐閒金剪竹裡春愁冷翠裙畱得  
舊時殘繡在傷心不忍讀回文

洞庭連天樓

崔嵬古廟壓危沙縹緲飛樓入斷霞南極千峰迷楚越西

江衆水混渝巴鯨人夜出風低草龍女春還雨溼花北倚  
闌干望京國故人何處認星槎

寄鄂季弟幼霖並寄仲弟次舟

弟兄終歲長羈旅南北何時却定居春至每瞻衡岳雁秋  
來猶食武昌魚每愁年長須經事卽恐家貧廢讀書仲氏  
應門獨辛苦平安消息近何如

吾親雙鬢日紛紛爲客艱難不使聞養老只須常善飯生  
兒何必總能文書同洛下思黃耳心侶河陽見白雲季弟  
還家報兄好歸期猶恐過春分

和危山臞寄弟

天子開朝策治安近臣每入漏初殘香飄紫殿迴金爵仗

下彤庭度玉鸞御苑種田春正樂邊城吹角夜猶酸腐儒  
未省經邦計直道休歌行路難

畫戟連雲甲第高內官如雨送春醪貢金半鑄分封印賜  
錦多裁侍宴袍自古聖明非獨治至今材武係相遭文章  
且共安徽命廊廟由來錄舊勞

故園兄弟總相思久客懷歸屢失期司馬却慚題柱早東  
方翻恨上書遲都門樹暗愁中見鄉國花繁別後知昨日  
南橋訪春水望雲回首獨多時

天涯骨肉久離居京國風塵鬢欲疎娛日強傾開歲酒憶  
家頻看隔年書路通一水花開裏門掩千峰木秀初便擬  
邀君此時發歸舟同食楚江魚

送何時學游湖南北

涔陽極浦遠帆多憶昨狂游是處過今日送君如夢寐少年爲客莫蹉跎沅湘日落明秋葉江漢風迴亂夕波若過楚壘憑借問沙頭芳草近如何

歸舟阻風

洞庭十日風勢號沙頭客舟如繫匏沅湘九道白波立衡霍千峰元霧交神龍欲蛰無定窟黃鵠將歸愁故巢咫尺城樓不得上何因一望楚江郊

高明樓

江上孤城映水回市中層櫺出塵開衡廬樹入青天盡章貢波翻白日來每日陳登門有客最傳王粲賦多才剛子

百尺應能借乘興誰同月下杯

寄題番陽周子震金潭山居

大氣生旁薄元功接杳冥江開吳楚白山直斗牛青玉牒  
呈天秘金潭泄地靈百盤工取勢千疊互殊形石吐高低  
筍峰羅大小屏忽如森隊伍復侶倚娉婷六六移諸洞三  
三映列星靜宜營道室幽或下仙輶客有依文物兒皆尚  
典刑卜藏思買宅佩訓謹趨庭娛老心能遠登高步每停  
艱難成宿志窵窵慰千齡雨潦供漂木神祇助薦牲史畱  
徐穉傳碑勒蔡邕銘碧水通銀漢蒼霞護石扃暝迷中谷  
路晴見客溪亭鳳穴含飛旭龍湫蓄震霆倚廬浮晻靄行  
徑俯清冷鸞鶴軒羣岫龜蛇汎遠汀陰陽持抱負存沒總



安寧種竹期成實栽松擬伏苓  
人居鄰犬息清誦夜猿聽  
夜燭吹藜杖歌饗瘞土鋤馬卿能作賦  
韋氏舊傳經伯仲  
翔鵬鶚東西念鶴鴒  
倅雍初識面京國共漂萍  
磊落珠藏櫝光芒刃發硎  
卽看培遠業誰得限修翎  
何日過彭蠡從君感醪醕  
遂求靈運屐一望眺林垌

登岳陽樓

馳傳自青天憑高憶往年  
闌干映水迴埤垌與雲連  
江合沅湘大山侵楚蜀  
偏蜃郎通別井龍女宅重淵  
日月鴻濛裏風沙浩蕩前  
驪珠秋後冷犀火夜深燃  
張樂猶疑奏乘槎欲並仙  
登臨倚去騎寵饒情離筵  
地氣南交接天文北極縣  
賦慚王粲作詩擬杜陵  
傳渺渺衡陽雁迢迢浪泊鳶

早春回漢節應得汎湖船

戲效子夜歌體與達兼善御史同賦

種荷深水中日夜期成藕蓮子逐浮萍風波漂蕩久  
織錦望成疋終朝不盈尺誰知方寸間千絲萬絲積  
思將儂別淚溢作長江水處處逢歡船任歡行千里

陵州

遠道千峰隔長河萬折流風帆不可住今夕過陵州

和陳宗道元夕襄江南絕句

萬家行樂愛春晴花底遙聞度曲聲惟有客窗嫌月色  
人離恨太分明

廣西卽事

南鎮干戈日夜陳  
西山寇盜出猶頻  
荒村百里無烟火  
聞道官軍更殺人

北歲供輸不自聊  
祇今氛祲未全消  
陳前將士須殊死  
莫倚功多氣轉驕

金人擊鞠圖

駿馬如雲擊鞠馳  
衣冠彷彿正隆時  
向來北地誇豪俊  
不省中原厭亂離

舟行

漁家日莫亂收罾  
欲及前舟苦未能  
行盡綠楊三十里  
隔河遙見驛亭燈

無題

天台靈草滿溪香  
縹緲鸞笙隔洞房  
誰見桃源花樹裏  
春來日日侍劉郎

江頭芳樹碧重重  
中有危樓對楚峰  
盡日娉婷倚窗下  
看花不使外人逢

樓上仙衣捲薄羅  
樓前春暖杏花多  
鳳簫最好吹明月  
惟有蕭郎自教他

江草離離江水流  
玉人何處卷簾鉤  
垂楊學盡春來瘦  
不省人間有別愁

南屯老翁行

南屯老翁年七十  
官府征徭困供給  
大男送糧赴軍前  
次男守寨不得眠  
盜賊時時劫生口  
東鄰西舍日夜走  
今朝

喜見朝廷使持酒含懷說前事筋力雖微不敢休辛勤更  
備官軍至教兒應役莫逃亡縣男成長身日強但願明年  
盡殺賊耕種官田得兒力

京師守歲

日月催時序乾坤隔晦明殘年萬里夢今夕幾人情久客  
煩朋友雙親倚弟兄深慚須薄祿不得謝浮名

古楊花怨

楊花白如雪無事學高飛莫作浮萍草漂零不可歸

題飲馬圖

一斛寒泉照紫駟蕭蕭駿尾動高秋夜來櫪上西風滿憶  
傍寒雲飲隴頭

追和蕙蘭二首

小窗開盡碧桃枝憶得青鸞化去時昨夜秋風妒幽怨夢  
中吹斷素琴絲

江上愁時復值春帶圍寬盡不宜身階前舊種櫻桃樹日  
暮飛花故著人

櫂歌

河中日日水悠悠誰道人心似水流河水灣迴有時直人  
心屈曲幾時休

朝朝風雨送船行白日無晴夜有晴東岸口燈西岸見中  
間猶白不分明

待船日日恨船遲船頭水聲無斷時昨夜天清好新月誰

家學得畫蛾眉

攀柳莫攀當路柳繫船須繫上風船當路人行無好樹主  
風浪小得安眠

去年船裏逢端午今年船裏又端陽九節菖蒲本仙藥如  
何曲曲似愁腸

寧向泥中棄蓮子莫向水上種桃花蓮子出泥終見藕桃  
花隨水不還家

悼亡

驚飈吹羅幕明月照階砌春草或不芳秋蘭亦同死斯人  
蘊淑德夙昔明詩禮靈質奄獨化孤魂將安止迢迢湘西  
山湛湛江中水水深有時極山高有時已憂思何能齊日

月從此始

皇天平四時白日一何遽勤儉畢婚姻新人忽復故衮裳  
歛遺襲棺槨無完具送葬出北門徘徊恒歸路玉顏不可  
恃况乃紈與素纍纍花下墳鬱鬱塋西樹他人亮同此胡  
爲獨哀慕

新婚誓偕老恩義永且深旦暮爲夫婦哀戚奄相尋涼月  
燭西樓悲風鳴北林空帷奠巾櫛中房虛織紵辭章餘婉  
孌琴瑟有餘音瞻故物惻愴內不任豈無新人好焉  
知諧我心掩穴撫長暮涕下霑衣襟

人生貴有別室家各有宜貧賤遠結婚中心兩不宜前日  
良宴會今爲死別離親戚各在前臨訣不成辭傍人拭我



江表詩集 卷三十一  
三  
淚令我要裁悲共盡國人理誰能心勿思

陳克生

克生豐城人

送傅與礪廣州教授

貧賤苦別離君行在良辰去去何能畱徘徊出城圍浮雲  
蔽平野迴風動飛塵俛仰重回顧執手含酸辛夙言遠結  
交綢繆日相親君今萬里去欲住良無因

燕馬紛北馳越鳥翻南翔良友不可別嘉會焉可常一日  
爲九秋三歲悠且長相顧從此別對酒不能觴念子難久  
留愁思結中腸安得千里足相與俱騰驤

征車出都門良友獨何之彷徨不能別攜手欲同歸臨河

解兩袂相顧各有期芳時不努力歲月日夜馳君亮懷至  
寶我獨何能爲

宋 沂

沂字子與清江人由成均諸生擢藝文監掾遷  
州從事復除常山縣尹有春詠亭藁

送遂都水赴海運萬戶

都水使者日邇來黃金虎符照漕臺笑持英簞入滄海不  
比徐福求蓬萊將軍昔騎青驄馬風采桓桓丹闕下紫髯  
如戟半成霜議論精神更瀟灑今年運米發東吳三百萬  
石皆明珠揚旗列戟耀雲漢伐鼓鳴金轉舳艫將軍尚文  
今尚武何物鯨鯢敢予侮櫓槍蕩滅荆獠平報政歸來奏

明主

送趙御史仲禮之任南臺併簡兼善達公經歷元載  
王公用道孔公二御史

天子龍沙拜法官議郎新戴辟邪冠曉辭漠北冰霜重秋  
到江南草樹寒諫疏頻煩明主聽題詩長共故人看應憐  
閭里誅求急尚布朝廷禮意寬幕下風清鳴一鸛  
端雪  
齊兒雙鸞寥寥渡海三冬翻煜煜凌空五色翰晉代新亭  
蒼蘚合梁朝舊寺土花殘石城慷慨悲袁粲別墅風流憶  
謝安千里憑高麾緇斧幾回攬轡並銀鞍諍臣事業須公  
等努力明時匪素餐

題燕士李叔成靜怡精舍

叔成故淮安郡侯子也

守道豈忘世脈脈重端居曠懷不可極清風生太虛寂寂  
獨無營欣欣常有餘童子啓窗戶晝讀孔氏書窅然在隘  
巷時來長者車問我何棲遲東陵未邱墟矧伊幽州士胡  
爲臥空廬答云各有志素絲尚匪汙相從賦黃鳥駕言歌  
白駒鳳兮或來下愧彼狂接輿

題澹齋

泠泠山下泉謾謾松上風松風吹我心置彼山泉中清深  
聊洗耳汪洋因盪胸時時酌元酒孰與甘醴同張侯坐齋  
閣尺宅如虛空泊然濯塵慮明德庶彌崇

題聽秋軒

樛樛夫何如幽齋致虛極相看數竿竹更覺萬籟寂顯景

逾清曠天宇彌寥泬涼颼發金奏繁露溥玉滴高梧庭鶴  
唳衰憇候蟲唧願言凝耳韻端居以游息

東海謠奉送宋太監降香海上天妃廟

東海鯉魚搖赤尾舳艫盡發江南米帆檣出沒蛟鼉窟靈  
雨神風勞帝子紫衣使者麾金幢麒麟煖玉隱天香元君  
畫下翠旗溼百靈冉冉天吳立使君騎馬歷東吳中父  
老爭迎趨自言春濤漂白骨官家下詔復征役今年隴畝  
杭稻空縣官索租到疲癯丁男登山拾橡栗妻孥含酸向  
人泣使君北來候神人應憐赤子百憂集明年海若不揚  
波君歸宣室當如何

贈別黃德廣赴郢

江上相逢渾未久忽對芳尊傾別酒君向燕臺萬里遙我  
畱吳會三春後當年曾入承明廬千官委佩侍金輿此行  
剩擬長楊賦何用頻封光範書

白鶴觀次韻鄭蒙泉呈朱仲文陳庶子

誰寫黃庭一兩章碧桃花發日初長欲求大藥黃金鼎先  
解明珠白玉璫漠漠春陰連海氣遲遲雲影度天光羣公  
共愛幽棲好芝草瑤花雜衆芳

送傅與礪佐使安南

皇帝三年頒正朔使君萬里向交州瑤池天闊龍光漏銅  
柱雲低蜃氣收陸賈獨能持節往終軍因得棄繻畱幕中  
爲惜懸河辯毛遂歸來坐上頭

奉餞御史中丞汪公大司徒致仕歸隴右

仗引絳騶中執法鏡懸清鑒大司徒當今天子尊元老自  
昔諸侯祖二疏臘盡挂冠辭北闕春來供帳出東都魏舒  
執第施行馬薛廣傳家保賜車德教萬民蒙帝賚王封四  
世贊皇圖翰蕃方國歌周雅帶礪山河著漢書燕塞驩駟  
知故道隴雲鸚鵡識前驅平泉草木芳華裏終日垂紳擁  
玉魚

寄馬易之

近日淮南見馬卿新詩句句掇瓊英畫船不肯留三日先  
載東風過四明

自是風流愛鑑湖木蘭舟上倒金壺鱸魚蓴菜戀鄉國馬

渾蒲萄憶帝都

羅蒙正

蒙正字希呂廬陵人父稽叔遊學新會因家焉省  
檄爲高州學正秩滿歸至正間又授南恩州教授  
有希呂集

次韻余太常觀國招撫江南航海至新會

日月行天豁翳昏茫茫元氣載重坤三山在望端倪萬  
水朝宗海獨尊飛馭羲和凌若木窮河漢使到崑崙功成  
得似班司馬絕域生還度玉門

鳳掖珊瑚響珮珂龍池風暖綠生波節辭仙仗排闥去帆  
趁春潮帶雨過北極神君尊帝座南箕星象逼天河騷人



江表傳卷三十一  
舊是瀟湘客幾濯滄浪發浩歌

鴻濛氣接沈寥天夷獠爭迎漢使船駭浪千重行處雪齊  
州九點望中烟神遊太乙仙藜外身在靈生海市邊玉署  
詞華君獨步聲名知不愧盧前

三殿傳宣勅使來皇華俊彩煥中台方蓬瑞氣翔雙鳳渤  
澥濤聲殷萬雷雲夢心曾吞芥蒂邱山名節冠崔巍秋期  
歸對金蓮直人在中天白玉臺

繡斧承恩霄漢間節旄南去幾時還蒼茫析木津頭路縹  
緲雲鼇海上山禁苑花濃今正發扶桑弓健舊曾彎竝遊  
羣俊長相憶逸駕重來許共攀

世教湮微竟孰扶空嗟禹貢舊輿圖北庭淑氣仍燕趙南

國遺風尚越吳弭節曉雲三島近濯纓秋水一塵無九重  
前席長沙傳莫憚嚴程聽鷓鴣

天開闔闔百官朝賢俊寧煩束帛招丹鳳九重傳鳳詔蒼  
龍萬里過龍標飄飄高步瀛州客嫋嫋餘音赤壁簫歸路  
湘南芳草遍清風離思轉迢迢

舳艫千里快乘風百粵三韓去路通島樹隱霞春綽約梅  
花吹雨曉空濛水環鰲極坤維碧雲捧蓬萊日色紅馳志  
伊吾鳴歛夜中興今待漢臧宮

春日聞鶯

旭日明臺榭微風散綺羅樹陰涼翠合鶯囀落紅多闌寂  
懷人處間關奈爾何嶺南天氣好二月已清和

寄謝何東道

故人違我久千里慰相思樽酒成山甕籠鵝到墨池青山  
荒草徑暮雨落花時賴有春洲雁南來可寄詩

登圭峰懷蘇長公

久向風塵厭薄遊到來象外且淹留溪邊石枕和雲臥巖  
畔山茶帶雨收古寺老僧非舊主疎林晴色又新秋坡仙  
題詠今殘剝詞客登臨誦未休

獨秀峰卽事呈都閫諸公

獨秀峰前鬼燐青戰塵未洗血痕新城扉寒掩平川日烽  
火明連遠戍星汀鴈失羣秋漠漠樹烏無夢夜冥冥蓮花  
柏樹多材俊早晚山林見太平

寄黃尚書

尚書昔日弦歌地芳草萋萋滿訟庭  
上界仙題丹桂籍南州人誦瑞蘭銘  
黃雲覆隴秋嘗稻鐵鍵長歌夜不扃  
離亂如今那可說荒郊過雨爛腰腥

高州寄友人

梅花又發去年枝遊子天涯未授衣  
舊友別來書滿篋新居共後草生扉  
青霄有路凌風到紫水無槎泝月歸  
歲晚望鄉心最切太行東北白雲飛

初秋

落日關河笛一聲感時懷抱若爲平  
燕臺已朽千金骨秦塞虛防萬里城  
大火西流金有令長江東去水無情  
故園

回首干戈滿空負滄浪白鳥盟

寄恩平吳奏記

聞說恩平吳奏記三年戎馬只儒衣  
魂逃槃瓠營宵拔血迸颺颺劍夜飛  
富貴總輸屠狗得行藏未必臥龍非  
路人盡識將軍意笑待青袍破賊歸

和白石馬教授

蕭蕭白髮映童顏塵世千年邂逅間  
三十六陂明月夜許騎仙鶴過緱山

穠綠溪橋烟樹樹殘紅池沼雨家家  
遊蜂不悟青韶去猶抱虛庭薺菜花

懷馬教授

陳編落落韋三絕  
浮世茫茫海九環  
經濟功成疎傅老  
漢庭前日得身還

水生白石渡頭灣  
念子携書共往還  
今日相思不相見  
越南殘照海門山

江西詩徵卷三十